

Jahresbericht vor Trachtegruppe Gurzele 2015

Ds Vereinsjahr 2015 faht wie mischtens mit Sitzige a. So si am 6. Januar der Vorstand u am 7. Januar Liederkommission zämecho. Der Vorstand het bim neue Vorstandsmitglied Thomas Bühlmann daheim d HV vorbereitet u d Liederkommission het bir Dirigäntin Hanny Burri daheim nöii Lieder usegläse u d Lieder für di verschiedene Aläss dür z ganze Jahr zämegschteut für em Chörli vorzschlah.

Ou im 2015 hei mir Tanzfroue viu schöni Aläss u Übige törfte erläbe,. O nit säute isches vor cho, dass mir nach der Üebig no eis si ga zie, so hei mir üsi tolli Kameradschaft ou chönne pflege.

Eis vo dene schöne Erläbnis isch ou z'Kurswuchenänd z Lyss am 17. u 18. Januar gsy. Dert hei mir wieder viu neuui Tänz gelehrt.

Am 14. Januar isch z Chörli mit em erschte Probeabe i z 2015 gschtartet.

D Wuche druf isch d Prob usgfaue wieu am Hanny Burri sis Mueti isch gschorbe.

D Bernadett Burgener vom Jodlerklub Thun – Heimelig het organisiert, dass vo beidne Vereine die wo hi chönne, a d Beärdigung uf Kriens si ga singe.

Mir hi du am 28. Januar vor üser Prob no mit de Thuner zäme die zwöi Lieder d Lüt im Dorf u Mi Boum gühbt.

O z Hanny isch a däm Mittwoch, der Abe vor der Beärdigung, uf di viertu ab achti mit üs cho d Lieder singe füre Uftritt z Goldiwil vom erschte Februar. Das isch nid säubschtverständlech u mir wüsse das o z schätze!

Donschtigmorge, der 29. Januar am sibni bi starchem Schneefau u brekäre Strasseverhäutnis si mir abfahre gäge Kriens zue. Am eufi isch Truurfiir gsi. Es het d Zyt grad brucht, wiu me numme so mit 60 het chönne fahre.

Es isch e bewegende Momänt gsi die zwöi Lieder vorztrage aber es het sehr guet zur Abdankig vom Pfarrer u zum Läbe vom Hanny's Mueti passt.

Am 30. Januar het üsi HV bi Haldemanns im Gürbmättli statt gfunge. I ha scho chli Härzchlopfe gha so zersch mau! Es isch aber aus guet gange, dank der guete Vorbereitig im Vorstand.

Mir hi abschliessend es feins Nachtässe übercho u Kafi mit Gebäck.

Danke vieu mau är Familie Haldemann!

Am Sunntig druf si mir vom Chörli scho wieder ungerwägs gsi. U scho wieder hets gschneit. Mir si froh gsi hets im Chörli so

mängs wo es Auradouto hi, süsch wäre äüä nid aui uf Goldiwil uche cho.

I der Chiuche Goldiwil hi mir zum Chiuchesunntig mit em Thema „die Kirche zum klingen bringen“ dörfe ga 5 Lieder singe. Es isch e abwächsligsriiche Gottesdienschd gsi vo Laie geschtauet. Aschliessend si mir zum Kafi iglade worde u hi o dert no paar Lieder gsunge.

I finge setegi Ufritte si guet für üs u bereite Früd.

Aschliessend si die mischte no z Gurzele itz Chrütz ga z Mittagässe. O das isch fein u gmütlich gsi.

Der Sunntig 8. Februar hi d Annarös, d Christine, Schneiders u i z Schwarzeburg verbrunge a der BKJV Delegiertenversammlig.

E Wuche später isch di ganzi Trachtegruppe im Pflege-und Altersheim Wattewiu ga singe u tanze.

O dene Lüt mache mir aui Jahr vieu Früd u bringe e chli Abwächslig.

Samschtig der 7. März si der Thomas, ds Käthi u i z Langnou im nöie Tigersaau a der EJVD Delegierteversammlig gsi. Es isch schön inisch üsi Eidgenöseschi Präsidentin z ghöre aber mit dene vieune Rede u Ehrige isch äs e sehr längfädige Namittag gsi.

Im 2015 u 2016 muess Trachtegruppe d Vereinsdelegierte-Versammlig z Gurzele düreführe.

Üsi Sekretärin Barbara u i hi das am Mäntig der 9. März im Chrüz organisiert gha.

Da hüt aui Date wia Mail iche chöme isch das nid e längi Sach gsi.

Merci a dere Steu der Barbara für dä Veranstauegskaländer zämezscheue.

Am Mittwoch der 11. März si der Hans-Jörg u i z Seftige a der Delegierteversammlung vor GJV gsi.

Delegierteversammlung vom Mittelland am 13 März isch z' Oberbalm gsy. Dert si Daniela, Ernst u z'Vreni Brönnimann drbi gsy.

Am Paumsunntig der 29. März hi aui e schtränge Tag gha. Es isch Trachte z Morge uf em Jahresprogramm gschtange. Mir hi ganz vieu Gescht törfe begrüesse u verchöschtige. D Annarös het mit Ihrne Kollege Musig gmacht u mir hi o no zwü Mau 3Lieder gsunge. Es het de Lüt gfaue u si hi sicher aui gnue chönne ässe. Danke vieu mau für öiie gross Isatz über das Wucheänd.

D Blaskapäue Jantar het üs o i däm Jahr agfragt für d Feschwirtschaft z führe a Ihrem Konzärt im MZG. Mir hi das am 11. April organisiert. Das isch e guete u schöne Abe wo üser Kasse o no chli e Zuschtupf bringt.

Trachtegruppe Belp het am 15. April z'Regionauträfte düregführt. Mir Tanzfroue vo Gurzele hei dert tatkräftig mitmacht und tanzet. U am Schluss hei mir üs ä feini Turte gönnt.

Da mir ja a ds Jodlerfescht uf Hasle-Rüegsau göh, si am 15. April der Peter Künzi u am 29. April der Ueli Zahnd mit üs am Wettlied cho schaffe. Das het guet ta u mir hoffe, dass mir das o chöi umsetze.

Üses Gründigs- u Ehremitglied Hedi Wenger isch 95. Jährig worde!

Am 22. April si mir i z Chrüz Gurzele iglade worde u hi dert am Hedi mit üsne Lieder u ame Blüemli dörfe gratuliere.

Mir si so richtig verwöhnt worde u hi e schöne, gmütleche Abe mit Wengers verbrunge.

Danke vieu, vieu mau!!!!

Üsi beide Kathrins hei am Trachtebott z'Ins am 26. April teilgno. Sie hei dert ä schnöne Tag verbracht. Merci öich beidne das dir teilgno heit.

Daniela u Ernst Rohrer hei am 30. Mai am festleche Tanzabe im Casino z' Bern teilgno.

Z Vreni Brönnimann het organisiert, dass mir i d Chiuche Amsoldingen am 31. Mai im Gottesdiensch hi dörfe ga singe. I dere bsungere Chiuche wo e gueti Akustik isch machts Früd zum singe. Danke Vreni das du das igfädlet hesch.

Amne Junimäntig si mir ist Ghörlose Heim z Uetendorf. Dert hei mir ou mit de Heimbewohner tanzet. Für si u ou für üs isch das ganz ä tolle Abe gsy.

So u jetz isch der Höhepunkt vom Jahr für z Chörli da gsi! Mir si a ds Bärnerkantonale Jodlerfescht uf Hasle-Rüegsau ga singe. Mit em Lied „Wermi, Troscht u Liebi schänke vom Ueli Zahnd hi mir es Gut erreicht.

Nach em singe si mir im Schnitzuhuus, Restaurant Brännli fein u vieu ga zMittag ässe.

Der Namittag hi aui nach ihrem gutdünke verbrunge u am Abe si mir im Zäut Sunnberg zämeghöklet u hi chli gsunge.

Am Sunntig hi mir e schöne, richtig Ämmitalische Feschtakt dörfe erläbe.

Der Abschluss vo däm Feschtwucheänd isch im Chrüz Gurzele am Sunntigabe mit üsne tröie Fans us Dütschland gsi. Der Uwe het no grad si 60. Geburtstag gfiiret.

I danke am Hanny a dere Steu no mau für dä gross Isatz bis üses Lied sowit isch gsi u o öich aune, mir hi sicher zmügleschte gmacht u user de Jurore hets vieune Lüt Früd gmacht!

Üses brätle het am 26. Juni i der Chühweid stattgfunge. Mir si feiechli e Tschuppele gsi u hi dä gmühtlech Abe gnosse.

Härzleche Dank aune wo öpis für das grossartige Dessertbuffet hi bitrit.

Üsne Manne wo gäng luege das mir so schöni Gluet hi zum Brätle Danke i o ganz härzlech!

Der 8. Juli isch am Kläry Burkhalter si 80. Geburtstag gsi.

Üses Ehremitglied het ke grossi Sach wöue mache, drum si mir du z viert ga es Bsüechli mache u es Blüemli überreiche. Mir hi e gmühtleche Abe zäme verbrunge.

Am 16. Juli hi mir müesse Abschied näh vo üsem Ehremitglied Lydia Ammann.

I der Chiuche z Bäup hi mir „D' Lüt im Dorf „u „Mi Boum“ gsunge zu Ehre vo der Lydia.

Am 17. Juli isch Truurfiir vo Peter Fankhauser i der Chiuche Uetedorf gsi. Mir si uf Wunsch vo der Lisebeth ga „Mi Boum“ u „Üse Vater“ singe.

Üser Lieder hi sehr guet zu de ifühlsame Wort vo der Frou Pfarrer passt.

Früd u Leid si scho gäng nach binang gsi! Üse nächscht Uftritt isch am Hochzyt vo Roland u Fränzi Hänni i der Chiuche Gurzele gsi.

Mir hi dene Zwü mit de Lieder „Hochzytstag“ u „Das cha nur Liebi si“ gloub scho chli Früd chönne mache.

75. Jahr Jodlerklub Alphüttli Rümligen isch am 12. Septämber z Toffe gfiiret worde. E Delegation vo üs isch derbi gsi u het es Gschänk überreicht.

Am 13. Septämber hi si du z Toffe o no grad z Gürbetaler Jodlerträffe düregführt. Mir hi die zwü Lieder „s' Glück im Läbe“ u der „Pajazzo“ gsunge.

Es isch gäng e zfriedene Tag mit au dene Jodler zäme.

Der 26. Septämber isch üse Reisetag gsi. 43 Persone si mit Engeloche Richtung Innerschwiiz gschtartet. Der erscht Haut isch i der Glasi Hergiswil gsi. Dert hi mir z Labyrint bsuecht. Das isch luschtig gsi. Gäng u gäng isch me wieder ine Schiebele glüfe. Es si aber aui wieder ganz use cho.

D Froue hi du natürlech no wöue ga Lädeler. Dene viele schöne Glaskreatione chame eifach fasch gar nid widerstah.

Üses Ziel isch aber ds Stanserhorn gsi. Thomas het für üsi Trachtegruppe e guete Pris usghandelt für mit der nöie Cabrio-

Bahn uf ds Stanserhorn z fahre. Es isch sehr sittig der Bärguf gange u z Wätter isch super gsi.

Wo mir du aber dobe si gsi isch der Näbu gäng wie meh cho u mi het d Ussicht fasch chli i Etappe müesse gniesse, bis es du ganz het zue ta.

Es wär sehr idrücklech weme die ganzi Rundsicht würd gseh. Der letscht Haut für z Nachtässe hi mir im Restaurant Bäre Eggiwil gmacht.

Mir hi guet gässe u e gmühtleche Usklang vo däm Reisetag gha.

Ads Tanzleiterträffe z' Gümligen isch am 25. Oktober Daniela gange. Sie het üs nachdäm informiert, wases aus für nöii Tänz git.

Ärntedankgottesdienst z Gurzele i der Chiuche am 25. Oktober isch üse nächscht Uftritt gsi! Mir hi vier Lieder törfe singe. U der Höhepunkt vo däm Gottesdiensch isch doch Tufi vo Bühlmanns Timo gsi. Der Timo het nämlech i sim Chüjermutzli guet zu üs passt.

Am 14. Novämber hi mir uf Iladig vo der Maja Binggeli am Jodlerabe vom Jodlerklub Diesbach törfe ga mithäufe.

Z Chörli het zwü mau drü Lieder törfe vortrage.

Turnhaue isch guet bsetzt gsi u d Lüt hi Früd gha a üsne Lieder u o a de Bärnertrachte mit Hube!!!!

Der 28. Novämber, der 3. u 5. Dezämber si wieder drei strängi Tage für Trachtegruppe ufem Jahresprogramm gschtange. Üser Ungerhautigsabete!

Mir fiire i däm Jahr z 60 jährige Bestah vo üsem Verein. Us däm Alass hi d Christine u Wali e Fotoschou zämegschteut wo mir vor em Programm u i der Pouse hi la lufe.

Das het de Gescht u o de Vereinsmitglieder gfaue. Danke Christine u Wali für di grossi Arbeit!

Zum Asäge vom Programm hi Mitglieder Müschterli verzeut us Ihrem Vereinsläbe.

Das isch o guet acho! Danke das dir hit mitgmacht.

Es Jubiläumskafi hi mir o no kreiert, mit Abricotin Schnaps u eme Gützi i Noteform.

O i däm Jahr hi mir wieder aui drü mau der Saau vou Bsucher gha. Es het bi aune drei Gruppe guet klappet u usem Publikum isch vieu positivs zu mir zruggcho.

Danke der Theatergruppe wo so vieu Zyt investiert für ds Üebe, danke aber o öich Mitglieder für öie Isatz. Es brucht eifach aui das so e Alass funktioniert.

Mir si aber o froh das nid no schlimmi Unfäu si passiert! Es isch hüür chli der Wurm drinn gsi!

D Annarös isch am erschte Abe Ohnmächtig worde! Isch du aber Gott sei Dank nume churz gsi u nähr grad wieder mit cho singe.

Bi Aschi isch e Stuhl zämegheit u mit ihm z Bode, het o nüt gmacht u Wali hets bim Theateru ungeruse gno u isch glücklicherwis o nüt passiert. Si mir doch dankbar das es bi däm isch blibe.

D Auterswiehnachte isch am 9. Dezämber im traditionelle Rahme düregführt worde.

D Schüler hi e Gschicht vorgläse u o d Frou Pfarrer Sahra Botha het e Wiehnachtsgschicht vorgläse.

Nachem z Nacht hi mir wieder gsunge u tanzet.

Es isch e zfriedene Abe gsi.

O i däm Jahr hi mir der Autjahrshöck am 29. Dezämber bi Künzis düregführt.

Es si 49 Persone agmäudet gsi u 44 hi du chönne cho. Mir si wieder so richtig verwöhnt worde vor Regina u der Madeleine (Johann isch chrank gsi.)

Es het wunderbare suure Mocke u Härdöpfustock gäh u es feins Dessärbuffet.

So gmütliche Abe tüe üsem Vereinsläbe guet u chitte zäme!

I däm Jahr 2015 isch z Chörli 54 mau zäme cho, dadervo si d HV, z Trachte z Morge, u 12 Ufritte gsi. Zusätzlech no z Jantar Konzärt u drei Beärdigunge u eis Hochzyt.

I wet a dere Steu üser Dirigäntin Hanny Burri ganz hätzlech danke für dä gross Isatz für üses Chörli dür z ganze Jahr. Es isch schön bisch du üsi Dirigänti!

Tanzgruppe isch 40 mau zäme cho, dadervo si d HV, z Trachte z Morge, z Autersheim, d Auterswiehnachte u der Uetedorfbärg gsi.

Üsem Tanzleiterpaar Daniela u Ernst Rohrer danke i ganz hätzlech für dä gross Isatz dür z ganze Jahr. Es isch schön sit dir bi üs.

O mir Tanzfroue wete dir Daniela u dir Ernst ganz, ganz hätzlech Merci säge für di enormi Gedued wo dir geng für üs ufbringet. Äs macht eifach Spass mit öich zäme z'Tanze. Mir fröie üs immer ufe Mänti.

Danke wet i Öich aune für e guet Bsuech vo de Probe u füre gross Isatz bi de Aläss.

Es isch schön we aui am gliche Strick zieh.

Der Lieder- u Theaterkommission u de Rächtnigsrevisore o es
grosses Merci für öii Arbeit.

U z letscht es ganz grosses Merci a mini Vorstandslüt. Es isch
dankbar mit öich zäme dä Verein z leite.

Für z nöie Vereinsjahr wünsche i öich gueti Gsundheit u mängs
schöns Zämesi mit der Trachtegruppe.

Gurzele im Jäner 2016
Öii Präsidentin
Marianne Reust

